



TEAMSTUFF.COM

LA APP PAR SEMPLIFICÂ LA VITE AI AMANTS DAL SPORT VUÊ ANCJE PAR FURLAN



Par cure di ARLeF – Agenzie Regionâl pe Lenghe Furlane

Teamstuff
Less work, more play.

Si lavore di mancul, si zuie di plui.

La APP multilengâl par semplificâ la vite aes scuadris di cualsei discipline sportive.

In chei dîs achi e torne a tacâ la stagjon sportive dai grancj champions di serie A e ancje chê di dut il setôr sportîf dai zovins dal Friûl. La gjestion di une societât ma ancje la organizazion gjenerâl de singulis scuadris e il passaç di informazions a son ativitâts simpri avonde intrigosis pai dirigjents, alenadôrs e dispès ancje pes fameis.

Ma di cualchi timp, par semplificâ la vite dai amants dal sport, e je nassude *Teamstuff* la prime App, ancje par furlan, gratuite, protete e cence pubblicitât dedicate ae gjestion des scuadris e dai lôr apontaments di alenament e di competizion.

La aplicazion e je stade realizade de australiane Teamstuff (<https://teamstuff.com>) che e à acetât cun entusiasim la propueste de ARLeF - Agenzie Regionâl pe Lenghe Furlane - di voltâle par furlan stant che si presente za in altris 11 lenghis.

La App Teamstuff e je stade sperimentade, in graciis de iniziative di Stefano Devoti, appassionât di balon e di tecnologjiis digjitâls, gjenitôr e dirigjent de Aurora, tal campionât 2014/2015 dai fantats e des fameis dai "Allievi" de societât de Aurora Buonacquisto di Remanzâs e tal 2015/2016, verificade la grande utilitât e facilitât di ûs, e je stade doprade di dut il setôr dai zovins de Societât. Par tacâ a doprâle a bastin pôcs minûts: si discjame la aplicazion, si cree la squadre, si inserissin i nons e riferiments personâi; a chel pont si pues invidâ duçj a partecipâ al servizi e a iscrivisi.

Di chel moment la squadre, lis fameis, l'alenadôr e la societât a son duçj in contat cence sfuarç e ogni informazion che ju tocje e zire in maniere svelte, semplice e cence coscj: alenaments, oraris partidis, assencis e presincis a puartade di man, cambi di datis o di cjamps, convocazions, calendaris sportîf cui risultâts des partidis, mapis par rivâ tai cjamps di zûc...

Cun di plui pal alenadôr *Teamstuff* e met a disposizion struments par fâ statisticis e notis par planificâ e par gjestî la prestazion dai siei zuiadôrs.

La app di *Teamstuff* e je un strument ancjemò pôc cognossût ma al è adat pe gjestion des scuadris di svariâts sports, no dome di balon; al è stât presentât te version furlane ae fin dal 2015 a Remanzâs in ocasion de inaugurazion dal cjamp sportîf dut bilengâl. Ae presince des Istituzions locâls, di chês sportivis regionâls, de ARLeF e di Gianfranco Cinello in rapresentance dall'Udinese Calcio al è stât screât un model che al va daûr de filosofie dai grancj cjamps di balon europeans che a doprin simpri la lenghe dal lûc par infuartî il leam cui lôr tifôs e che al podarès jessi replicabil cun facilitât in duçj i cjamps dal Friûl.

Te ocasion ancje une partite amichevule tra Aurora e Terzo, trasmetude in direte di Radio Onde Furlane, cul coment, amplificât in dute la tribune e dome par furlan, dal atôr Claudio Moretti e dal gjornalist sportîf Enrico Turloni.

Cun Teamstuff par furlan cumò si zuie pardabon in cjase: no ti reste che provâ!

www.teamstuff.com

Priscilla De Agostini